

# နှင်းစကား

တိတ်ဆိတ်တေ ရာသီ  
အီးစက်နီရေ နှလုံးသားကိုယ်စီထဲ  
ဗလောင်ဆူ သွီးသားတိ ပြည့်ဝန်...

သမိုင်းပင် အိုကေလေ့  
ဆောင်းသစ်ပျိုကို ရောက်တိုင်း  
ခွာညိုအလှတိနန်၊ မြူးကြွ၊  
ငွေနှင်းမြူ ဖြူဖြူတိကြားထဲက  
ရပ်ကြွင်းအိုအလှနန်၊  
ပူလောင်ဖက် ပြာသိုကို ထိတို့မိရေခါမှ

အာပါပါ...  
နှင်းစက်ပွင့်ဖြူတိကနီ  
ထွက်အံကျလာရေ စကားလုံးတိ.....။

စာတည်းအဖွဲ့  
ကဗျာဝါသနာသျှင်များ  
မြောက်ဦးမြို့

ပြာသိုလ်ကဗျာစုတိ

နှင်းရည်ပူ



228th Anniversary

ရခိုင်ပြည်ကျဆုံးနိဗ္ဗာန် အထိမ်းအမှတ်

Future Arakan Shining Stars (F.A.S.S) Group

မှ အခမဲ့ ကူညီ ထုတ်ဝေဖြန့်ချိပါသည်။

### ချောတိုင်တက်ပွဲ

ချောတိုင်က ရှည်  
ချောဆီက များ  
အင်အားက နည်း  
တက်ယင်း ချောကျယင်း  
ချောကျယင်း နလန်မထူနိုင်ယင်း  
မြီရင်းမှာဂျဲ ဝု

ဒေပိုင်နန်၊  
ဂေါင်းတစ်မော့  
ဗောင်းဖျားထက်က အလံတိုင်ချောကို  
ငေးပိုင်ပိုင်နန်၊

ကြော်...  
လက်မှိုင်ချန်ရရေ ဘဝတိ။

ပီရခိုင်



### ၁၁၄၆ ပြာသို

ဆီမီးခွက်ထဲက ကန်းညင်ဆီခဲ  
ခါချလို့မကျ အီးစက်ရေ ပြာသို၊

ရွာလယ်ဂေါင်ည ဆီမီးခွက်အလှ  
ပျိုကညာရိုး ခိုးပိုင်းပြိုရေ ပြာသို၊  
ချစ်သူပီးသင်နန်၊ ဇမ်းစကားဖို့ ထား  
အသက်ကိုဖက်နန်၊ ထုတ်ပြီးကတ်ရရေ ပြာသို

ကောက်ကိုရိပ်ကြိတ်တိုးတန်းလန်း  
ကျီရိုက်တိုကို ပြောင်းဖို့ မရရေ ပြာသို၊

လွန်းတောင်ထက်က ဗဟိုစည်သံ  
ဝေဟင်ယံတိုင် ထိမ့်ထိမ့်ကြိုးအောင်  
ရိုက်ဆော်သံတိ ဆိတ်သုဉ်းလားရေ ပြာသို

နန်းတော်ထွဋ်ထိပ် ခေါင်စွန်းငါးဆင့် ခြင်္သေ့တင့်စွာ  
မှန်ကင်းအလှ ကြွမကျဘဲ  
အဓမ္မ ထင်းဖြစ်ရရေ ပြာသို၊

ပြည်သူထိပ်ထား မှန်ဖျားကို  
ယူဖို့အတင်း ခါးပြလာရေ ပြာသို၊  
ရခိုင်ပြည်သူ ကျွတ်ကျွတ်ဆု  
ပူလောင်သောက ငရဲကျရေ ပြာသို၊  
ကိုယ်ရဲ့ချင်းချင်း ဝါဒကွဲလို့  
သခင်ဘဝက ကျွန်ဆိုးဘဝသို့ ဆိုက်ရောက်လားရေ  
ပြာသို၊

အဂ္ဂ

### အတိတ်ဒဏ်ရာ

အို.....ငဲ့မျက်ဝန်းတိထဲမှာ  
မီးတောက်မီးလျှံတိ  
ငရဲမီးပိုင် လောင်ကျွမ်းလို့  
ခါး၊ မြှား၊ လှံသွားတိ  
ဝါဆိုမိုးပိုင် ရွာသွန်းလို့  
ငါရို့ သွီးချက်ချေတိ  
ချောင်းပိုင်စီးဆင်းလို့  
ငါရို့ မျက်ရည်တိ  
ရိတ်ခွန်ပိုင် သွန်ကျလို့  
ငါရို့ ဘဝချေတိ  
ရွက်အိုချေတိပိုင် မြီခနီရလို့

တောက်...နားထောင်ကြည့်လိုက်ဖိ  
အတိတ်က ငါရို့ အော်သံချေတိ  
မြင်ယောင်ကြည့်လိုက်ကေ  
သရီးဒီဇာတ်ကားလည်း မဟုတ်  
စဉ်းစားကြည့်လိုက်ကေ  
ဒဏ္ဍာရီဆန်ရေ ဝတ္ထုချေလည်းမဟုတ်  
တွေးကြည့်လိုက်ကေ  
နိန့် တိုင်းမက်နီရေ  
အိပ်မက်ဆိုးချေလည်းမဟုတ်

အော်...ငါရင်ထဲမှာ ဒီဇင်ဘာ ၃၁  
ဒီဇင်ဘာ ၃၁  
ရိုက်ခတ်လာရေပဲတင်ထပ်သံချေတိ  
ဆူပူလာရေ ဒေါသလှိုင်းချေတိ  
အခန်းကျဉ်းထဲမှာ ငါတစ်ယောက်တည်း

ကြိတ်မှိတ်ခံစားယင်း  
အောင့်အီးသည်းခံယင်း  
စဉ်းစားမွန်းကျပ်ယင်း  
နောက်ဆုံးတော့.... မခံနိုင်  
ကလောင်ကိုကိုင် ဆုံးခန်းတိုင်အောင်  
ကိုယ်တိုင်ရီးလာ ငဲ့ကဗျာ။

မင်းမြတ်ဝေ

### ငါလွမ်းရေ

တစ်လေးသုံးသုည အေဒီမှာ  
သန္ဓေတည်ခွီးဖွား  
တောင်ပြိုင်းပြိုင်းကြားက  
ထွန်းကားခရေမြို့...၊

တိုင်းတပါးရို့နန်၊  
စီးပွားကုန်သွယ်  
ရောင်းဝယ်ဖောက်ကား  
ခမ်းနားတင့်တယ်  
ဖွံ့ဖြိုးစည်ပင်  
ကမ္ဘာတစ်လုံး ကျော်ကြားခရေ မြို့...။

ကျိန်စာသင့်လို့ ကျုံးမြို့ရိုးတိ ပျက်ပြို  
နန်းတော်ရာ အက်ကွဲ  
အမှောင်ထဲရောက် စင်းလုံးမှောက်စွာ  
နှစ်တိရာချီကြာခဗျာလ်...။

မိုးလီမမှန် မှန်တိုင်းဒဏ်တိကို  
ကြိုဆို အံ့ကြိတ်ခံပနာ  
စိုင်လာနွယ်ဆက်  
နန်းမြို့သက်ရှည်  
စိတ်ရည်ရွယ်ပြု  
ထုဆစ်တည်ထားခ လေးမျက်နှာဘုရားမှာ  
ဝတ်တက်ပနာ ပူဇော်ယင်း  
စောမွန်မင်းကို လွမ်း.....!

ဖိုးခေါင်တောင်ထက်က  
အံ့ဖွယ်လက်ရာ  
ဗိသုကာ အလွန်ပြောင်မြောက်  
ရန်အောင်ဇေယျ သျှစ်သောင်းဘုရား  
စည်ကားစွာ ပွဲတော်ချ  
နွီကာလခါ  
ရွက်ဝါတိကကြွ  
ရွက်သစ်မဝီနိုင်သိမ့်ရေ  
သစ်ပင်ချေအောက်မှာ ထိုင်ပနာ  
မင်းဗာဘုရင်ကို လွမ်း.....!

တမ်းတရိပ်တိနန့်  
မွတ်သိပ်မိရေအတိတ်  
တိတ်ဆိတ်အိပ်ပျော်  
ရွှေနန်းတော်ထက်က  
နာသာလှရေ ဂီတ  
မကြားလိုက်ရရေ  
.....အသံမှန်း  
ငါလွမ်းရေ.....။

မင်းမြတ်ညို(ညောင်ခြံ၊ပုဏ္ဏားကျွန်း)

### ဝမ်းရီ

ကြည်လင်ချိုမြနီစွာစမ်းရီတိ  
ကျောက်ဆောင်ကျောက်စွန်ထက်က  
မာန်အဟုန်နန့် ခုန်ပေါက်ချောကျ  
စီးဆင်းပါလတ်စွာ ခရီးအရှည်ကြီး  
သွင်ကျောက်သောင်ပြင်ကိုဖြတ်သန်း  
သဲသောင်တန်းအကွေ့မှာ  
ချိုမြကြည်လင်နီတုန်းသိ  
သို့သော်...  
မြစ်ရီ အလျှင်းနန့်  
နုံးလွင်ပြင်ကိုဖြတ်သန်းရေအခါ  
ညစ်ညမ်းရီနန့် ရော  
ဆားငန်ရီနန့် ပေါင်း  
ယောက်ယက်ခတ်  
ဘောင်ဘင်သတ်လို  
ဘဝပျက်ပနာ  
လာစွာလမ်းကို မရောက်ခယာ။

အဂ္ဂ

### ရီသောက်အဆင်းမှာ

ခမ်းနားဘိ နန်းတော်ကြီးလည်း ပြုလဲ  
စည်ကားခရေ မြို့တော်က အနိဋ္ဌာရုံ  
ဖုန်ဒါတ်ကြီး မြင်းဟီးသံ ဘဝင်ညံ  
အော်ငိုသံတိနဲ့ လမ်းပျောက်  
ဗဟိုစည်လည်း ပေါက်။  
လက်ခမောင်းခတ် တောကြောင်အပြုံးကြားမှာ  
ကောင်းကင်ပြာကြီးလည်း မည်းနက်  
ကမ္ဘာကြီးပျက် မြင်ကွင်း  
ဖြစ်ပျက်ခြင်းနိယာမတစ်ခုလား?  
ဒေဥသြရီသောက်အဆင်းမှာ။  
သွီးရင်း(မြောက်ဦး)

### နာကြင်မှုဒီဇင်ဘာ

အီးမြရေညဉ့်မှာ ချေးတစ်ပြိုက်ပြိုက်နဲ့  
အတိတ်ကို တက် ခေါက်ယင်း  
ဒေါသတစ်လုံးတစ်ဆို့နဲ့ တွေး။

ပျော်ရွှင်မှု တစ်စက္ကန့်ပင် မတို့  
ဝေဒနာ တစ်ပုံတပင်နဲ့  
နှစ်သစ်က အာရက္ခအတွက်  
ကြွဲကွဲဖို့နုတ်ဆက်လာ  
အနှစ်မဟီ အဓိပါယ်မဲ့ လွန်းရေ  
အီးစက်နှင်းရီကြားမှ

ကံကြမ္မာက ဒါဏ်ခတ်ခြင်းလား။

ဒီဇင်ဘာ ၃၁  
ယင်းနီ ယင်းရက်မှာ  
ရက်စက်ကြမ်းတမ်းရေ ညဉ့်တစ်ပြင်လုံးစွာ  
ငါရို့ဝိညဉ့်ကို မီးလောင်တိုက်သွင်း  
လခြမ်းချေရို့ အော်သံငိုသံ ပွပွည့်ဗျာလ်  
သွီးချောင်းက အထိန်းအချုပ်မဲ့  
မြို့တစ်ပြင်လုံး စီဆင်း  
သွီးရန့်က ပျောက်ပျက်မလားခါ  
ရင်ဖတ်ထဲ နှလုံးသွီးထဲ  
နာကြင်မှု ဝေဒနာတိ ဒဏ်ရာဒဏ်ချက်တိကို  
ဇာအအီးခါတ် ဇာအဇို့ ခါတ်လား  
လွမ်းမိုးအနိုင်ယူဖို့

ကြည့်ချက်  
နာကျဉ်းချက်တိ သွီးမတိတ်ခင်  
ဘေးက အထိုးခံရသိမ့်ရေကား  
ဇာမှာလဲအဘာ၊ ဇာမှာလဲ အမင်

အော်.....လွန်ခရေ ၂၂၈ နှစ်  
ဒီဇင်ဘာ ၃၁ရက်ကပင်။  
ခိုင်မြဲအောင်(တိုးတက်ရေး)  
၂၆.၁၂.၂၀၁၂

**ကျောက်ရိုးမ**

ကျေးပင်ထက်မှာ ညောင်ကြက်  
နန်းတံတိုင်းမှာ တောထ  
ဇာတီဖျားမှာ ရွှေချ  
သင်္ဃာတောင်မပန်ဗျာလင်ကာ  
ရခိုင်သူမ...

ဝေသာလီမှာ ကြက်  
ပင်လယ်ပြင်မှာ လှိုင်းထ  
ရခိုင်ပြည်မှာ အရက်  
မျိုးဆက်သစ်တွက် မကျန်လီအောင်  
အားလုံးသောက်ပစ်ခ  
ခေါင်ရိုးက မိုးလည်းယိုကျ

ဖွတ်ကျား တိက  
ရခိုင်ပြည်မှာ တန်ခိုးပြ  
ခုခံလို့ တောင်မရ  
သစ်ပင်တောင်မပေါက်ဗျာလင်ကာ  
တောင်မှာ ရှာမရ  
ဦးခေါင်းက ဆံပင်ပြောင်ကျ

ပုထိုးထက်မှာ ရီညိုကြက်  
ရာသီဖောက်ကေ မှန်တိုင်းထ  
နီညချမ်းမှာ လီညှင်းက  
ယူဆောင်ပီးခ  
ရင်ထဲက ပြည့်လို့ အန်ချ.....။  
ခိုင်ရင်သွီး(နန်းမြို့)

**ကိုင်း.....စဉ်းစား**

လက်ညှိုးလက်မ တစ်ထောင်ထောင်  
ကိုယ်ကောင်ကတစ်လှုပ်လှုပ်  
အပူရုပ် ဟန်လုပ်  
ကိုယ့်ကို ကိုယ်ဟုတ်ယောင်ကားဗျာ။

မဆီမဆိုင်နွားပြီးရာမှာ ဖျာဆိုးရွင့်ရေပိုင်  
မျက်လှည့်ဆရာက အသက်သွင်းပနာ  
သူပလွီဖျားက မြို့ခေါ်သံနန်း အတူ  
သူခိုင်းသမျှ လုပ်ပီးသမျှ စားနီရရေ  
ပလက်စတစ် အရုပ်ချေတိဆိုစွာ  
စဉ်းစားမိယင့်လား  
အနတ္တတရားဆောင်  
မင်းလည်းအပုပ်ကောင်  
ငါလည်းအပုပ်ကောင်။  
မောင်မေတ္တာ(မြောက်ဦး)

**အားလုံး-----နန်း**

ဥဩရီ မသောက်ခင်က  
ပြိုင်ဖက်မဟု လူ နန်း  
ဥဩရီသောက်စွာနန်း၊  
ရခိုင်အင်ပါယာ တစ်ခုလုံးပျက်  
ဆောင်းနှင်းတိပြု  
သွီးမိုးတိကျ  
ဒီဇင်ဘာ ၃၁ ရက်  
လူမျိုးတုန်း စီမံခံ ရစွာ...

ကွမ္မာကြီးစိုးအောင် လင်းခရေ မီးအိမ်  
လင်းကြက်တွန်နန်းချိန်တိုင်း  
ဗဟိုမင်္ဂလာစည်တော်တိုင်းနန်း၊  
ရိုးမ ဟီးအောင် နီးထခ စည်တော်  
ဥဩရီသောက် အရောက်မှာ  
လရိပ်တိပျောက်  
စည်တော်လည်း ပေါက်ဗျာလင်  
ထိုနိန့်မှ စပျာ သမိုင်းရုပ်ကြွင်း  
ငါချက်ချင်းပင် ဖြစ်ရရေ..

အမှောင်တိ ကြီးစိုး  
အလင်းမတိုးအောင် ဖန်ဆင်း  
ယေဒါလည်း  
သီလအားနန်း၊ ဂုဏ်တင့်  
အမျိုးအားနန်း၊ အရာရာကို ဖန်းဆင်းဗျာလင်  
နှစ်သစ်မှာ အားလုံး.....နန်း။  
ခိုင်ရင်ထွန်း(သင်္ဂနဒီ)

**အရိပ်၏ အားမာန်**

အတိတ်က  
အရိပ်မည်းတစ်ခု သီလုမတတ်  
ရှူးသွပ်ခံစား ဆိတ္တီလား မသိ  
မပီပိုးဝါး မထင်ရှားလည်း  
ထီးနန်းသက်သီ သမိုင်းမို့တိ  
ဂုတိုင်ဟိရေ...

ရက်လနစ်တိ တရို့ချေပြောင်း  
အဟောင်းအသစ် ပြန်ဖြစ်နိုးထ  
သွီးတစ်စက်ချေ....

တစ်စက်ချေသွီး ယိုစီးဆင့်ပွား  
သန္ဓေသားဖြစ် ရခိုင်စစ်တိ  
စိတ်ထားတူညီ ရခိုင်မြို့၌  
ရဲရဲနီမြန်း အားသစ်လွှမ်း၍  
နီဝမ်းတမျှ ထွက်ပြုလတ်ပျာ...


မျိုးမြင့်အောင်(ရ.ဟ.တ)

ပွဲသစ်

မန္တလေးပါ...  
မကြုံစဖူး...လို့လေ့  
မကရဲ့ မခနဲချင်  
ပြာသိုလွင်ပြင်ကို ဖြတ်ကျော်သူချင်း.....

လူတော်ပင် ပြောပြော  
လူညံ့ပင် ဆိုဆို  
ပြာသိုအိုကို လွမ်းတတ်သူချင်း.....

ဖာနည်လို့ပင် မြောက်မြောက်  
အညကြဲလို့ပင် နိမ်နိမ်  
ဒေဝိုင်စိန်ခေါ် မူတီနန့် ရင်ဆိုင်တိုးချိန်မှာတော့ကေ  
ဝါသနာအရ မဟုတ်ကေတောင်မှ  
သွီးနန့် ကစပ် ပြခမေ။  
ညီဇော်လတ်



ရခိုင်သားရောဂါ

ဒေန်လူငယ်၊ နောင်ဝယ်လူကြီး  
သီးသီးပြန်လာ၊ သဘာဝ။

အစကောင်းမှ၊ အနှောင်းသေချာ၊  
ငယ်ခါပြုပြင်၊ ပညာဝင်၍  
ဆင်ခြင်နိုင်ညှိ၊ သိမဝင်က  
ကြီးပင်ကြီးငြား၊ နွားသားတမျှ  
အောက်တန်းကျတည့်။

ပညာရောင်လွမ်း တစ်ဝှမ်းကမ္ဘာ  
လင်းရောင်ဖြာလည်း၊ ရခိုင်မှာမိုက်  
စရိုက်ဖောက်ပြန်၊ သိဉာဏ်နည်းပါး  
ချို့ရခိုင်သား၊ သောက်စားယစ်မှူး  
အရူးထလို ကောင်းတုန်းသိ။

စာရိတ္တမကောင်း၊ ပြုယိမ်းယိုင်၍  
နိစဉ်သောက်စား၊ ဝင့်ကြွားကြွားနှင့်  
ရခိုင်သားမှာ ၊  
သင်္ကြန်ခါသောက်၊ ဝါကျွတ်သောက်၍၊  
တန်ဆောင်မုန်းလည်းသောက်၊ မိတ်ဖြစ်သောက်၍၊  
ကျန်းမာရေးလည်းသောက်၊ သူ့ပြုသောက်၍၊  
အသုဘလည်းသောက်၊ သမက်တက်သောက်၍၊  
ပျော်လို့လည်းသောက်၊ စိတ်ညစ်သောက်၍၊  
ပျင်းလို့လည်းသောက်၊ လူကြီးသောက်၍၊  
လူငယ်လည်းသောက်၊ မိန်းမသောက်၍၊  
အသောက်ချင်းပြိုင်၊ ထိမ်းမနိုင်ကတ်  
ဖြစ်ရပ် ဆိုးဝါး၊ ရခိုင်သားရောဂါ  
ကုရာနတ္ထိ၊ ဆီးမတွိ။  
စိန်ထွန်း

နီးထကတ်

တစ်တစ်လေးခြောက်၊ ခုနှစ်ရောက်မှာ  
ပြာသိုလဆုတ်၊ မယုတ်ခုနှစ်  
ဆိုဖြစ်လာမို့၊ နိစနီဝယ်  
မသွေလေးချက်၊ ညဘက်ခါမိ  
လေးနာရီတွင် ပြည်ခွင်ညေ  
ကျဆုံးရသည်၊ များလှပြည်သူ  
ကျွတ်ကျွတ်ဆူလျက်၊ ကွဲအက်နှလုံး  
အမှောင်ဖုံးခ။

ပူဟုန်ပြင်းပြ၊ ကဆုန်လတွင်  
နန်းမဆောင်ဆောင် ထိပ်ခေါင်ခေါင်ရို့၊  
တောက်လောင်ညီးညီး၊ ငရဲမီးသွင်  
မြင်ရသျှင်လူ၊ ဘဝင်ဆူပွက်  
ယောက်ယက်ခတ်လျက်၊ ကမ္ဘာပျက်သို့  
စီးကျမျက်ရည်၊ ဖြေမဆည်နိုင်  
ယိမ်းယိုင်ကိုယ်လက်၊ သက်ပြင်းချသည်  
ပြီးရ လွှားရ၊ ဒုက္ခပင်လယ်  
ကျယ်ထက်ကျယ်ကာ၊ မပြယ်မီးခိုး  
ဆယ်ရပ်စိုး၍၊ မြူခိုးဆင်ကာ  
မီးလောင်ပြာကျ၊ အစမမြင်  
ပြန်းပြန်းစင်သည်၊ လောင်ပြင်ကိုသာ  
အာရုံမှာဆင်၊ ပြက်ပြက်မြင်သိ  
မချိန်လုံး၊ ယူကျုံးမရ  
နှလုံးလန့်ထိတ်၊ အံ့ကိုကြိတ်မိ။

ထီးနန်းလည်းဆုံး၊ ပြည်လည်းပြုံး၍  
မုန်လည်းဆုံး၊ ဘာသာသုဉ်း၍  
မင်းမျိုးလည်းတုံး၊ မူးမတ်ဆုံး၍  
စစ်သူကြီးပြန်း၊ ရဲမက်ဆုံး၍

ပညာဟိတုံး၊ ယဉ်ကျေးမှုဆုံး၍  
ပုဏ္ဏားလည်းပြန်း၊ ကျမ်းပေါင်းဆုံး၍  
သမားလည်းတုံး၊ ကျန်းမာရေးဆုံး၍  
ဆယ်ပန်းလည်းသုဉ်း၊ စာပီပြန်၍  
အာဏာလည်းဆုံး၊ လူမျိုးသုဉ်း၍  
ဆုံးတုံးသုဉ်းပြန်း၊ စုပေါင်းရုန်း၍  
လူလုံးမလှ၊ ဘဝမွန်းကျပ်  
ငတ်ပြတ်ဆင်းရဲ၊ ဒုက္ခဝဲအား  
အများရခိုင်၊ တူမြိုင်ညီညွတ်  
ထပ်လောင်းအင်အား၊ ဆည်တားပြုပြင်  
ပြည်သစ်ဆင်ဖို့၊ ဉာဏ်မြင်နီးထသင့်ပြီတာကာ။  
စွဲကြိုင်

မော်ဒယ်လ်

မော်ဒယ် နှင့်အသက်က  
၂၂၈နှစ်ပါ..

အာ...ယင်းလောက်ကြီးကေ  
အရိုးမတွန်သိမ့်လား  
၂၃၂ နှစ်မှာ  
မင်္ဂလာ အခမ်းအနားနန့်၊  
ဘိသိက်ခံပနာ  
အဆုံးသပ်ဖို့လားလို့...  
အိပ်မက်နန့်၊  
စိတ်ကူးယဉ်စွာမဟုတ်ကေ  
ကြုံဆိုပါ၏ မော်ဒယ်လ်  
ဆက်လုပ်.....။

ပုံ/ ထိုးကမ်း



### နီးထကတ်ပါဖိ

အဘာဟိခါ  
ငရီရရိုင်  
အောင်လံတိုင်း လီမှာရွှင့်  
အောင်စည်က တညညံနန့်.  
ငါရီ၊ လူရာဝင်ခရေ အဘာ..

အဘာဟိခါ  
ဆောင်းလရက်မှာ သင်ပန်းတိ  
ပင်မြင့်မှာပွင့် နှင်းနန့်တင့်ခရေ အဘာ..

အဘာ  
ဒီဇင်ဘာ၃၁ က ဆောင်းမှာ  
နှင်းမိုးရွာ လီအီးမတိုက်  
သင်ငိုက်ခဗျာလ် အဘာ...

အဘာမဟိခါရေ ဆောင်း  
ဥဩရီသောက်တေနီနန့်က ဆောင်း  
ငါရီ၊ အောင်လံလည်း မြေကျ  
အောင်စည်လည်း မညံနိုင်ခဗျာလ် အဘာ..

အဘာမဟိခါကလေ့နီ  
ညှိုးနှမ်းနီရေ သင်ပန်းနန့်၊  
အိပ်စက်နီရေ အဘာသားတိ  
ရောင်နီထိုးမိုးသောက်ကေ  
ဖွဲသတ္တိ အားမာန်နန့်၊  
ပြန်ဗျာလ် နီးထကတ်ပါဖိ။  
မိုးသောက်ပန်း(နန်းမြို့.)

### အတိတ်အရိပ်

မုန်ဝါး အတိတ်  
တွေးကြည့်ကေ ရင်နာ  
ဒီဇင်ဘာ ၃၁  
မိန့်ပျောက်မရ ရင်တိ ကွဲအက်လို့၊  
အောင့်သသနန့်၊  
တရိပ်ရိပ်ထင်ဟပ်  
ဆုတ်ကပ်အမှောင်ထဲက အိပ်မက်ဆိုးတိကို  
ဇာခါဖျောက်လို့ ရနိုင်ဖို့လဲ  
ဪ...အတိတ်အရိပ်။  
မိုးနတ်သူဇာ(ညေမြို့)

### နန်းမြို့

ထားခရေ ငါရီ၊ အဖက  
အဖိုးဖြတ်မရ သွီးနန့် သားကို  
နှလုံးသားမှာ စိမ့်စိမ့်လျှောက်

လျှောက်လီရာတိုင်း  
ရောက်လီတိုင်းပင်  
လွမ်းချင်စရာချင့် ရင်နှင့်ဖွယ်

လွမ်းလည်း လွမ်းယင်း  
စဉ်းစားယင်းမှာ  
မြင်ယောင်တမ်းတ အဖလှပြည်  
ဆယ်ကမ္ဘာတိုင် တည်တံ့ခိုင်ဖို့၊  
သစ္စာတိုင်မည်  
ငါရီ၊ ဖိုးဖ နန်းအဖို့...။

မသျှေ

### နှင်းဒဏ်ရာ

နှင်းဒဏ်ရာမှာ ဒီဇင်ဘာလ  
ကျခရရေ သွီးမျက်ရည်လည်း  
မီးခိုးငွေ့ပိုင် ပျောက်လားနိုင်ရေ  
ရခိုင်မှန်ကေ ရင်နာရဖို့!

အမှောင်ထဲမှာ ငိုက်လာနီစွာ  
အလင်းကိုမျှော် သို့ပါသော်လည်း  
အလင်းမိန့် သား၊ နှင်းပွင့်စားချေ

တိတ်ပါ...တိတ်ပါ၊ လာဗျာလ်ဘာဘာ  
ဆန်ရီစပါး၊ ပေါကြွယ်များလည်း  
မဝရီစာ ဒီဇင်ဘာမှာ  
စားရလီယင့် အိုနှင်းပွင့်ရို့၊

လွမ်းလီခရေ အယင်ပြည်ကို  
ကိုယ့်ရီကိုယ့်မြို့ ကိုယ့်အခြံနန့်၊  
နီလေ့မရ အိုဒုက္ခလေ...

နှင်းကျချိန်က  
ရခစွာ ဒဏ်ရာ နှင်းဒဏ်ရာ။

ခိုင်သူရိန်ထွန်း

### ပြန်ဗျာလ်အသက်သွင်းကတ်ဖို့

မိန့် လို့မရရေ ဒီဇင်ဘာတစ်ရက်  
၃၁မှာ ကျမျက်ရည် မြေဝယ်ခဖူး ရေလေ

ထီးနှင်းဆိတ်သုဉ်း မင်းဆက်တုံးလို့၊  
ရွှေရောင် ရက်တိကို မှောင်အတိ ကျစီခရေ

မိစ္ဆာသားကောင် အယုတ်တမာ ကောင်တိကြောင့်  
အဖိုးအဖီးသွီးလေ့ ချောင်းဖြစ်ရရေ

၃၁-ဒီဇင်ဘာ၊ ဒီဇင်ဘာ ၃၁နန့်၊  
အလီလီနှစ်ပြောင်းလီခစွာ  
၂၂၈ဆိုရေ သက်တမ်းကိုတောင်ရောက်လာဗျာလ်ယေ

အို.....လခြမ်းမြီက ညီကိုရင်းချာရို့လေ  
ရုပ်ကြွင်းကျန်လိုက် နှင်းတော်ရာအဖြစ်ကို  
ရင်နာနာချေနန့်ကြည့်လို့၊  
လှခရေအတိတ်ကို ဝတ္ထုချေပိုင် ပြောမနီဘဲ  
အားမာန်အပြည့်နန့်၊ ဇွဲသတ္တိကို အလံလွှင့်ပြီးကေ  
စည်းလုံးခြင်းကို မဏ္ဍိုင်ထူလို့၊

ဒေ၃၁-  
ဒီဇင်ဘာမှာတော့  
ကြင်နာရေ နှလုံးသားနန့်၊  
အံကို တင်းတင်းကြိတ်ပြီးကေ  
ပျောက်ဆုံးနီရေ အတိတ်ကအရိပ်ကို  
ပြန်ဗျာလ်အသက်သွင်းကတ်ဖို့ယေ.....။  
မိုးဖွဲဖွဲ(မြောက်ဦး)

### သူမြင်နိုင်လီဖို့လား

အသက်ကိုပခါနမထား  
မြို့သက်ရှည်ကေ ကျေနပ်တေလူ  
သူ့စကား  
ဒီဇင်ဘာနှင်းစက်ကို မပြောခလိုလား..

အဂုကြည့်ဖမ်း  
ရခိုင်ကမ္ဘာကြီး လှောင်ပိတ်ခံရစွာ ၂၂၈နှစ်  
အလင်းမဟိ၊ အမှောင်ထုထဲမှာ  
ငိုသံတိ၊ အော်သံတိ  
စောမွန်ဘုရင်ကြားနိုင်လီဖို့လား

ဒီဇင်ဘာနှင်းဆိုးထဲမှာ  
မြောက်ဦးတစ်ခုလုံး သွီးဖုံးလားဗျာလ်  
ထီးနန်းတစ်ခုလုံး ပြိုပျက်လားဗျာလ်  
စည်တော်တစ်ခုလုံး ခြစားလားဗျာလ်  
ပန်းသဇင် ပင်မြင့်ထက်မှာ မတင့်တယ်နိုင်ဗျာလ်  
စောမွန်ဘုရင် မြင်ဝံ့လီဖို့လား

ဪ..  
မှောင်မိုက်နီရောဝမှာ  
နီမင်းတစ်ပတ် ပြန်လာဖို့ကို မျှော်ယင်း.....  
သိန်းဝင်း

### စာဆိုမမြင်ခရေပြာသို

အော်.....ပြာသို  
ပြာသိုလရောက်၊ နှင်းရည်ပေါက်ကြောင့်  
လွင့်ပျောက်မပြယ် အတိတ်နယ်ကို  
ပြန်လည်တမ်းတ ရင်နာရ၏။

ငွေနှင်းစို၍ ခွာညှိနွယ်ပန်း  
ပင်ယံနန်းဝယ် ပွင့်လန်းလှိုင်လှိုင်  
ရနံ့ကြိုင်၏။

တချိန်ကဆို ဒေပြာသိုကို  
စာဆိုအမွန် ဥက္ကာပျံက  
မွန်တိုင်းဟံသာ ရောက်စဉ်ခါဝယ်  
ကိုယ့်ပြည်ကိုလွမ်း ကဗျာစွမ်းဖြင့်  
အလွမ်းမပြေ ငယ်ကျွမ်းဆွေကို  
ရော်ရွယ်မှန်းဆ နှစ်လကြာညောင်း  
နို့ ဝိုးဆောင်ဟု ကူးပြောင်းလီလီ  
လရာသီထဲ အချမ်းကဲပို  
လပြာသိုကို ဖွဲ့နွဲ့ဆိုကာ  
ရတုစာဖြင့် ရင်မှာဖြေသိမ့်ခပါရေ။

အော်.....စာဆို  
စာဆိုကြံ့ခ ပြာသိုလနန့်.  
ခြားနားမတူ အဂုမူကား  
အယူမှောက်မှား ကျင့်ဖေါက်ပြားလျက်  
စိတ်ထားမမှန် အကောက်ဉာဏ်ပွေ  
စံရဗွေကြောင့် ...  
ကိုယ့်မြေကိုယ့်ရပ် လက်လွှတ်ဆုံးရှုံး  
ယူကျုံးမရ ကြံ့ဖူးခ၍  
နန်းမရဝေ မြေဝယ်ဇောက်ထိုး

ထီးကျိုးစည်ပေါက် ပြာပုံအောက်သို့  
ရောက်ခပြန်ရ ဤဘဝမှာ  
နှောင်လာနှောက်သား ရခိုင်သားရို့  
ကွဲပြားမနီ တူညီစိတ်ဝမ်း  
လက်တွဲလှမ်းကာ ကိုယ့်ပြည်ရွာကို  
သာပါစီကြောင်း သွီးသစ်လောင်းလျက်  
တင့်အောင်ကြိုးပမ်း နိုင်ကတ်စီ။  
မောင်န

### မြင်ပါ

ပြောနီကတ်တေ စကားမဟိ  
ငိုနီကတ်တေ မျက်ရည်မဟိ  
ဆာနီကတ်တေ အစာမဟိ  
လားနီကတ်တေ လမ်းမဟိ

မိုးကြိုးခါးကို ကိုင်သော လောကနတ်  
တိုင်ကြားပါရေ.မြင်ပါဖီ။  
ရဲထွန်းခိုင်

### ဒီဇင်ဘာ ၃၁ မှ ဥဒြသို.

ဒီဇင်ဘာ ၃၁  
နှစ်ဟောင်းကိုပစ် နှစ်သစ်ကို ကြိုဆိုလို.

၃၁ဒီဇင်ဘာ  
မီးပန်းလည်းဖောက် ပြောင်းလည်းဖောက်လို.

ဒီဇင်ဘာ၃၁  
သွီးချောင်းလည်းစီး ငိုလို.ကျွီးသံ ဘဝဂ်ညသို.

၃၁ ဒီဇင်ဘာ  
ပန်းသဇင်ညှိုး ထီးတော်ကျိုးဗျာ  
အမျိုးဘာသာ တခွင်ရွာလုံး  
မီးဟုန်းဟုန်းတောက် ငါးပါးမှောက်

ဒီဇင်ဘာ၃၁  
ဥဒြရီသောက် မင်းဆက်ပျောက်လို.

၃၁ ဒီဇင်ဘာ ဒီဇင်ဘာ၃၁  
ပြောင်းပြန်သတ်သတ် လုံးကြီးနှစ်ထပ်တင်  
c သတ်အမောက်တပ် ယီးချာ ပက်လက်လှန်  
မရိုးရေစာသားနန့် ရှိုးရှိုး  
ငရို့ ငရို့ သွီးသားထဲမှာ  
မိန့်ပျောက်ဖို့ဆိုစွာ  
ဝီးစွ ဥဒြ ဝီးစွ။

မျိုးချစ်လူ(မေယု)

# လှည့်ကြည့်လိုက်ဝေ

ဪ အယင်ခါဆိုကေ မြို့ရွှေမြောက်ဦးမှာ  
ကိုယ့် ထီး  
နန်း  
ဘုရင်နန်း.

ဪ အဂုခါဆိုကေ မြို့ရွှေမြောက်ဦး ဇာမှာလဲ  
ကိုယ့် ထီး  
နန်း  
ဘုရင်တိ....

အယင်ခါရခိုင်ပြည်  
စည်တော်သံတည့်ည့်  
ရွှေအောင်လံတရွှင့်ရွှင့်  
ကြက်ပုံမကျ စည်ကားရေး..

အဂုဆိုကေ ရခိုင်ပြည်ကား  
ခြံတောပိတ်နွယ် မြို့ခြေသုဉ်လာ  
ဖုံပြာပြာနန်း မြင်ကတိကြည့်ကတိ  
တွေးမိကတ်လား ရခိုင်သားရို့။

ညေလင်း(မြောက်ဦး)

# ၃၁ ဒီဇင်ဘာကပြန်အလာ

မျိုးမစစ်ဘဲ  
တလုပ်စာမြင်တတ်တေ  
သစ္စာဖောက်တိကြောင့်  
ဒီဇင်ဘာလ  
နှင်းမြူတိကြားမှာ  
အာရက္ခရို့ မျက်ရည်စက်တိ  
အော်ဟစ်သံတိ ကမ္ဘာကတောင် မမြင်ကြားခ...

မမြင်ကြားခလေ့  
အာရက္ခရို့ ရင်ထဲမှာ  
ဒေက္ခမ္မာပြုကေတောင် မမိန့်နိုင်ဘဲ  
ထင်ဟပ်ကြားယောင်နီလီရေး၊

အော်...ဒီဇင်ဘာ ၃၁  
မင်းရေ အာရက္ခရို့ အော်ဟစ်ငိုကြွေး  
အရိုးစွဲအောင် မမိန့်နိုင်ရေ နိန့်တစ်နိန့် ဆိုကေလေ့  
မင်းမကြာခင်  
အောင်ပွဲဆင်လို့ ပြန်အလာကို ကြိုဆိုပါ။  
မောင်ရက္ခ

# လပြာသိုလ်သို့အိတ်ဖွင့်ပီးစာ

ပြာသိုလ်.....  
ဆောင်းပက္ခဒိန်ထက်က ဥတုသင်္ကေတ  
နပျိုမျစ် မြွှာညို အလှတိနန်း အတူ  
ဆန်းတမူ ကြိုင်သင်းထုံ ဖွီးမြ  
ရက္ခိတရို့ လရာသီ စက်ဝိုင်းထဲ  
ငြိမ်းအီး ချမ်းမြမှုတိနန်း ဂျေးရာ  
သမိုင်းပီး တာဝန်ကျီ ဖူးရေး၊

ပြာသိုလ်.....  
ရွှေအိုရောင် နန်းဘုံဆောင်ကြားက  
ရက္ခိတရို့မြို့တော်အလှတရား  
ခါဆောင်းလယ် ငွေနှင်းမြူတိနန်း  
ထပ်ဆင့်တိုး ခြယ်သ  
ကျက်သရေ မင်္ဂလာ အပေါင်းရို့  
သမိုင်းစဉ်ဆက် ခ၊ညောင်း လီဖူးရေး၊

ပြာသိုလ်.....  
ရက္ခိတရို့ ဘုန်းလှုံတန်ခိုး  
မိစ္ဆာဆိုးရို့ မျိုးဖျက် လက်မာ  
ပက်စက် ပျောက်ကွယ်၊  
ရက္ခိတ ပက္ခဒိန် ကွင်းလယ်ဂေါင်ထဲ  
အမှောင့်ပြဿဒါး ရက်ဆိုးတိဂျေး တိုးဝင် ဖွီနောက်  
တစ်မိုးသောက်တိုင်း ငြိုးမပြေ  
တစ်မိုးသောက်တိုင်း ငြိုးမပြေချင့်၊

ပြာသိုလ်.....  
ကောက်ကျစ်နည်း အဖုံဖုံ  
ရက်စက်ပုံ အမျိုးမျိုးနန်း  
သမိုင်းမျိုးရိုး ပြန်းအောင် ကြ

မီးသံ၊ လှံသံ၊ ငိုသံ ၊ ကျီးသံ၊  
အော်သံ၊ ခေါ်သံ၊ ရာဇသံ တိကြား  
မပဒါ တေးသွားတစ်ပုဒ်ကို  
မြို့လူး ပြာကျ ခံစားယင်း  
ရုန်းမရ ကြမရ နိုင်ဖို့ချင်း တူတူ  
ဒေက္ခမ္မာ လခြမ်းမြိုကြီးအား  
သူတစ်ပါးသူ လက်တော်အပါး  
ရီစက်ချ အမှုဝီ ပစ်ကတ်ဖို့ ယာလား မသိ၊

ပြာသိုလ်.....  
ဂုလေ့ တစ်ချက်ကြည့်!  
မဟာ ရာဇဝင်တော်မြတ်  
အမှောင် ကလကာကြီး နောက်ကွယ်မာ  
ဆိတ်ခေါင် ခြောက်သို့၊  
ဇရာအို ချိန်၊ ကြို့ကွဲ နွမ်းလျ  
ခြံကုန် လက်ပန်းကို ကျလို့၊

ပြာသိုလ်.....  
လူညွန့် အချိုးခံထားရေ အိမ်မက်ဆိုးတိနန်း၊  
ဖျားနာကိုက်ခဲနီရေ လအိုတစ်စင်း  
ငန်းလိုက်နီရေ ခေတ်ဆိုးခေတ်ယုတ်ထဲ  
ရာစုချီ ရှည်ကြာ  
ရာစုချီ ရှည်ကြာလေ့  
ပြာသိုလ်.....  
လူအို၊ မြို့အို၊ အိမ်အိုအဟောင်းထဲ  
ရာသီအို ကြီး...သီတမ်းစာ ဇာခြင်းတစ်ပိုင်းတစ်စနန်း၊  
ရက္ခိတရို့ ဝံသာနုတရားတိ  
တဖန်ရှင်သန် နိုးကြားခွင့်ရစီဖို့  
ရာသီစက်ဝိုင်း တစ်ခါပြည့်တိုင်း  
တန်းခါး တစ်ချက် လာခေါက် အုံး။

ဝါသု



သမိုင်းနန်း လက်တို့

သမိုင်းစွာ မိုင်းရိပ်မဟုတ်  
သွီးသားတိကို မွီးထုတ်ပီးရေ  
လူ့ပြယုဂ်တစ်ခု

သမိုင်းစွာ လူ့လောက သင်္ခါဏ်းစာ  
ကောင်းဆိုးမွီးတိ ရောမြန်း  
ပြန်ခြံလှမ်း မမှားဖို့  
တကွဲတကွဲ ပြန်ပြော

အတိတ်ကို အတိတ်မှာ ထားခ  
တစ်ခါတစ်လီ ရ၊ တစ်ခါတစ်လီ မရ  
ဇာပင်ကြိုရရ  
လက်ဟိ လက်တို့ကရာ ပမေန

မျှော်လင့်ချက်ကို အသက်သွင်းဖို့  
ဥုံ ဖွ လို့ လီနန် မှုတ်နီလို့ မရ  
ချွေးသွီးအသက် ပီးဆပ်ကတ်ရဖို့ စွာက  
ဒေလောက၏ သဘာဝနိယာမ။  
ခေတ်သစ် မြဝါ

တစ်ထောင့်တစ်ရာလေးဆယ်ခြောက်

တစ်- ထောင်တစ်ရာလေးဆယ်ခြောက်မှာ  
မမှန်သွီးသား လူငန္ဓားက  
မွီးဖွားပေါက်လာ မျိုးယုတ်မာကြောင့်  
ထီးနန်းကွယ်ပျောက် ကျွန်သဘောက်သို့

ထောင်-သောင်းများစွာ လူများမှာကား  
အရှင်ငရဲ နီရဲရဲနန်း  
ပြည်ကြီးအနံ့ သွီးညီပြန်ကာ  
အိမ်တိုင်နွယ်ရိတ် လယ်တောဖြစ်၏

တစ်- တစ်ရက်တစ်လ တစ်ချက်ချေလောက်  
ဂုထိမငြိမ်း ပူမီးကြီးက  
တောက်မြဲတောက်လောင် ညီးပြောင်ပြောင်

ရာ- ထောင်ပီးဆပ် မျိုးအသက်မှာ  
ရွံ့တွက်မဆုံး လူမျိုးသုဉ်းလည်း  
လက်ကျန်ရခိုင် ဆိုင်းဆိုင်းမြိုင်လို့  
သံပြိုင်ဟစ်အော် ကမ္ဘာကျော်လိမ့်

လေး - ရပ်ဝတီတိုင်းဌာနီမှ  
မျိုးဆက်သစ်ဖွား ရခိုင်သားရို့  
မျိုးမြတ်မဟာ မင်းမင်းဗာအား  
ပမာတုယူ နည်းနမူဖြင့်

ဆယ်- စုများလှ ကျွန်ဘဝကို  
စွန့်ကာဖယ်ယှား လွန်ကြိုးစား၍  
သာကီနွယ်ဖွား ရခိုင်သားဟု  
ကမ္ဘာတစ်ဝှမ်း မျိုးဂုဏ်လွှမ်းဖို့

ခြောက်- တိုင်းမကြောက် လက်မမြှောက်ဘဲ  
ငါရို့ထီးနန်း ဘုံကြာငှန်းကို  
ငါရို့ရအောင် ကြိုးပမ်းဆောင်၍  
ငါရို့အောင်ပွဲ လက်ချင်းတွဲကာ  
အချိန်တန်ဗျာလ် ချိန်တန်ဗျာလ်ဟု  
အားလုံးသိလီ သိကတ်လီ။  
ရခိုင်သားလက်ကျန်

မီးမိုး

မိုးရွာဖို့ မိုးရိပ်တိ ထင်ခစွာ  
မျက်ရည်တိ မီးခိုးငွေ့တိ  
ရှေးခါ ဂီတမဟုတ်ကေ ပေါက်ကွဲသံ၊ ငိုသံ  
ကြိုင်းသံတိနန့်  
တစ်စစကြင်းကျန်လိုက်တေ အဖရင်ခွင်မှာ  
ရုပ်၊ နာမ် နှစ်ပါး အိုးစား ကွဲခရေ ရက်...၊

ယင်းနိန့်က  
နီကြတ်တေ လကြတ်တေ  
ရွှေရောင်အလှတိ သွီးနီဥပေါက်ကျလားခရေ၊

ငသံဒွေပေါရေ စံရဖွေပေါရေပြည်  
မင်းစောမွန်မျက်ရည်ကျအောင် လုပ်ခဝံ့သူတိ  
တစ်ရက်စာကို တစ်သက်စာထင်  
မြို့ပါလည်းဆုံး သားလည်းဆုံးအဖြစ်နန့် ဘဝတုန်း...  
နောက်ဆုံးတောခါ  
ကျစရာ မဟိရေ မျက်ရည်နန့်  
အသံပြာ အောင် ငိုနီရဗျာလ်လေ၊

ဒီဇင်ဘာ၃၁  
မြောက်ဦးမှာ မီးတောင်ပေါက်တေရက်  
မဟာသမ္မတရာဇာမင်း မျက်ရည်ကျရေရက်  
၁၁၄၇ကို ဝိညာဉ်နန့် နှုတ်ဆက်  
ကိုင်မရရေ လက်နန့် ပေ့ ဖက်  
ခံစားရကကောင်းခက်တေဝေ...၊

ယကေပင်လေ့ (ကံကောင်းခြင်း)  
သျှစ်သောင်းပုထိုးကျန်ခလို့  
အာနန္ဒစန္ဒြားမင်း ကျောက်စာတိုင်ကျန်ခလို့

နန်းအရာချေနန့် ဗုဒ္ဓအဓိအနစ်တိကျန်ခလို့  
မဟုတ်ကေ  
ငါ့ဘောပန်လေ့ ခရာမရွံ့နိုင်ဗျာလ်၊

မင်းရို့ချပီးခရေ မျိုးစိနန့်  
ငါ့ပြည်...နာရေဝေး  
ငါ့အမျိုး...နာရေဝေး  
ငါရင်ဘတ်လေ့ မခံနိုင်ဗျာလ်ဝေး  
ငါရို့ဘုရင် ကြည့်ခရေ ယိမ်းနန့်  
ငါရို့ဒေန်နီထိ ရင်မခုန်နိုင်သိမ့်ဝေ.....။  
မျိုးအတ္တ

ကိုယ့်ကြောင့်

မျိုးဂုဏ်တက်လည်း  
အဖမြီက  
အဖရင်သွီး သွီးသားမြီး

မျိုးဂုဏ်ဖျက်လည်း  
အဖမြီက  
အဖရင်သွီး သွီးသားမြီး။

မျိုးကရခိုင် သဇင်နှစ်ခိုင်  
မြိုင်စွာလူလား စည်းရုံးစွာ...အား။

ဖားအသံက မရကံ  
ပိုဖလံက မီးထဲ ပျံ  
ရန်သူလက်အောက် ဒူးကိုထောက် ၁၁၄၆။  
ကျူတုတ်